

ՀՀ ֆինանսների նախարարություն

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 57/6

25 դեկտեմբերի 2015 թ.

Քննարկվեց «Բրեդինվեստ» ՍՊԸ 03.12.2015 թ-ի գանգատը ՀՀ ՖՆ Արաբկիրի ՀՏ 26.11.2015 թ-ի թիվ 5102698 ակտի դեմ:

«Բրեդինվեստ» ՍՊԸ գանգատում բերված փաստարկները.

ՀՀ ֆինանսների նախարարության Արաբկիրի հարկային տեսչությունը (այսուհետ Ուսումնասիրող մարմին) 2015 թվականի նոյեմբերի 18-ին կազմել է օրենքով նախատեսված ելակետային տվյալների և գործակիցների ճշտության ստուգման ակտ, որով «Բրեդինվեստ» ՍՊԸ-ին (այսուհետ նաև ընկերություն) առաջադրել է 1656000 դրամի տուգանք համաձայն թիվ 5102698 ակտի: Ակտը ներկայացվել է «Արտոնագրային վճարների մասին» ՀՀ օրենքի թիվ 8 հավելվածի 5-րդ և 6-րդ կետերի պահանջները խախտելու համար:

Ստորև ներկայացվում է ընկերության առարկությունները վերոհիշյալ ակտի վերաբերյալ:

Ընկերությունը տեղեկացնում է, որ արտոնագրային վճարի և հայտարարության ուշացումը չի եղել միտումնավոր: Վճարումը կատարվել է էլեկտրոնային եղանակով բանկով 30.10.2015թ-ին՝ ուրբաթ օրը, սակայն չի հաստատվել բանկի կողմից, ուստի արտոնագրային վճարի հայտարարությունը առանց վճարման չի ներկայացվել: Վճարումը և հայտարարությունը ներկայացվել են 02.11.2015թ-ին՝ առաջին աշխատանքային օրը, քանի որ 01.11.2015թ-ը եղել է կիրակի:

Հարկ է հավելել նաև, որ ընկերությունը սկսել է իր գործունեությունը 2013թ-ի փետրվար ամսից, չունի ոչ մի չգրանցված աշխատող և աշխատում է բացառապես հարկային դաշտում: 2015թ-ին սկսել է վարել էլեկտրոնային գրքեր և իրականացնում է էլեկտրոնային բեռնագրերի հաշվառում: «Բրեդինվեստ» ՍՊԸ-ն միշտ պարտաճանաչ վճարել է հարկերը և ժամանակին ներկայացրել հաշվետվությունները:

Ելնելով վերոգրյալից, ընկերությունը խնդրում է ստուգման ակտը վերանայել և հնարավորության դեպքում կիրառել մեղմացուցիչ նորմեր:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ֆինանսների նախարարի 12.11.2015 թ-ի թիվ 5102698 հանձնարարագրի համաձայն «Բրեդինվեստ» ՍՊԸ-ում իրականացվել է օրենքով սահմանված ելակետային տվյալների և գործակիցների ճշտության ստուգում: Արդյունքում կազմվել է ՀՀ ՖՆ Արաբկիրի ՀՏ 26.11.2015 թ-ի թիվ 5102698 ակտը (այսուհետ նաև Ակտ), որով լրացուցիչ գանձման է առաջադրվել ընդամենը 1.656.000 դրամ:

Ակտի 1-ին կետով մասնավորապես արձանագրվել է, որ «Բրեդինվեստ» ՍՊԸ-ն ք.Երևան, Ամիրյան 11/19 և Թումանյան 38/1ա հասցեներում գործունեություն է իրականացնում հանրային սննդի ոլորտում: Ընկերության կողմից ներկայացված արտոնագրային վճար վճարողի հայտարարության և փաստացի ՀԴՄ ֆիսկալ հաշվետվության համադրումից պարզվել է, որ ընկերությունը 01.11.2015թ-ին վերը նշված հասցեներում իրականացրել է գործունեություն առանց արտոնագրային վճար վճարողի հայտարարության հայտ ներկայացնելու: Խախտվել է «Արտոնագրային վճարների մասին» ՀՀ օրենքի թիվ 8 հավելվածի 5-րդ և 6-րդ կետերի պահանջները: Համաձայն «Արտոնագրային վճարների մասին» ՀՀ օրենքի 9-րդ հոդվածի 7-րդ կետի ընկերությունից գանձվում է տուգանք առանց արտոնագրի գործունեություն իրականացնելու ժամանակահատվածի համար (բայց ոչ պակաս քանք ամսվա համար) 828000 դրամ, ինչպես նաև նշված օրենքի թիվ 8 հավելվածով սահմանված կարգով հաշվարկված վճարման ենթակա արտոնագրային վճարի կրկնակի չափով տուգանք՝ 1.656.000 դրամի չափով:

Քննարկման ընթացքում պարզվեց, որ ընկերությունը «Արտոնագրային վճարների մասին» ՀՀ օրենքով սահմանված կարգով 30.10.2015թ-ին՝ ուրբաթ օրը, էլեկտրոնային եղանակով վճարել է արտոնագրային վճարի գումարը, սակայն որոշակի անճշտությունների հետ կապված այն բանկի կողմից չի հաստատվել: Այդ իսկ պատճառով ընկերության կողմից չի ներկայացվել նաև արտոնագրային վճար վճարող համարվելու վերաբերյալ հայտարարությունը: Արդյունքում, արտոնագրային վճարի վճարումը և համապատասխան հայտարարությունը ներկայացվել է միայն 02.11.2015թ-ին՝ առաջին աշխատանքային օրը, քանի որ 31.10.2015թ-ը և 01.11.2015թ-ը եղել են ոչ աշխատանքային օրեր:

Հանձնաժողովի համոզմամբ քննարկվող դեպքում գործ ունենք մի իրավիճակի հետ, երբ 2015 թ-ի նոյեմբեր ամսվա համար արտոնագրային վճար վճարող համարվելու վերաբերյալ հայտարարության ուշ ներկայացնելը պայմանավորված է եղել այն հանգամանքով, որ 31.10.2015թ-ը և 01.11.2015թ-ը եղել են ոչ աշխատանքային օրեր, որի հետևանքով ընկերությունը զրկված է եղել հնարավորությունից ժամանակին ներկայացնել արտոնագրային վճար վճարող համարվելու վերաբերյալ հայտարարությունը: Հետևապես հայտարարության ընդամենը մեկ օրով ուշ ներկայացնելը, որը պայմանավորված է եղել վերոգրյալ հանգամանքների բերումով, ըստ էության, չի կարող հիմք հանդիսանալ Ակտի 1-ին կետում նշված պատասխանատվության միջոցները կիրառելու համար:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո ր ո շ ու մ է՝

Չեղյալ համարել ՀՀ ՖՆ Արաբկիրի ՀՏ 26.11.2015 թ-ի թիվ 5102698 ակտի 1-ին կետը:

Հանձնաժողովի նախագահ՝



Ա.ԲԻՐՈՒՄՅԱՆ